

四庫全書

史部

欽定四庫全書

史部

欽定八旗通志卷

三十八至
三十九

欽定四庫全書

欽定八旗通志卷三十八

兵制志七

軍政

巡防附

凡軍政五年一舉考察中外武職以定黜陟注上

考者薦舉卓異注下考者糾劾該管官具疏以

聞不入舉劾者以中平注考彙送兵部會都察院兵科

京畿道察覈題覆奉

旨以卓異加一級注冊候陞其以軍政糾劾貪酷革職
提問罷軟不謹革職老病休致才力不及降二級
浮躁降一級皆調用前有卓異應陞及加級紀錄
均不准抵銷

考察八旗武職在京管旗大臣及各省將軍都統
副都統等俱開列事實清冊在京於九月內送部
在外於十月內送部兵部彙齊繕具履歷清單進
呈至在京文員兼旗下武職者仍於京察時聽該部

院衙門考察不在軍政之列鑒儀衛滿洲各官八旗世職人員俱不行考察此外各衙門所屬武職各該管官詳核填注考語定以四格曰操守曰才能曰騎射曰年歲糾以八法曰貪曰酷曰罷軟無為曰不謹曰年老曰有疾曰浮躁曰才力不及並將各該員履歷及有無在軍前行走受傷得功之處注明分別應去應留造冊送部其堪膺薦舉官員必須行止端方弓馬嫻熟管轄嚴肅當差勤慎

不擾該屬給餉無虛考語併歷俸已滿三年任內
並無事故並試問

國語方准薦舉屆期兵部將管旗王貝勒等滿洲蒙
古都統前鋒統領護軍統領滿洲蒙古副都統滿
洲補授漢軍都統副都統兵部滿洲堂官職名開
列請

旨派出考察具奏其前鋒營護軍營官員軍政卓異由
領侍衛內大臣會同前鋒護軍統領等揀選薦舉

至各省駐防官員俱照在京官員之例該將軍都
統副都統等考察河南太原二處駐防官員該巡
撫考察其良鄉寶坻固安東安霸州采育里保定
府雄縣滄州九處駐防官員三年一次派有護軍
統領或副都統前往巡察管轄即令會同該管官
考核具奏內外考選軍政冊限於本年十月具題
乾隆二十四年二月

諭向來內外文武三品以上大員遇京察軍政之年援

例自陳文具相沿無裨實政曾經降旨停罷第念伊等游陟崇階並由特簡其人賢否優劣雖已均在洞鑒然其間亦不乏旅進旅退苟圖持祿戀棧之人若以平時既無大過足干例議又不按例甄核任其迴翔日久必致職業不揚甚非澄叙官聯之道嗣後兵部於軍政時將在京之都統副都統在外之駐防將軍都統副都統各省之提督總兵官分別為三本繕具簡明履歷清單進呈候朕鑒裁以重考績大典著為令

是年十月

諭據伊犁圖奏稱本年係應軍政之年將伊犁二城滿洲錫伯官員等照例考試分別定議保題等語向來定例伊犁官員等遇軍政之年保舉卓異後不令特行送京引見者原因伊犁為極邊地方往來拮据是以停其特送引見但此等卓異人員軍政大典攸關未經引見而將軍大臣等閱看即為卓異亦不得合宜嗣後伊犁等處官員遇軍政之年將指為卓異者

臨時奏聞註冊俟伊等應陞之缺保送引見時將卓異之處一併聲明具奏俟引見之日朕允准後再准其卓異其協領等內指稱為卓異者亦俟伊犁年滿送京引見之時一併聲明具奏引見之日朕允准後再准其卓異旋議定駐防旗員視地之大小官之多寡以定額黑龍江薦舉七人

盛京六人吉林察哈爾各五人西安伊犁各四人江寧杭州荊州烏魯木齊各三人綏遠城寧夏廣州

成都熱河密雲各二人山海關涼州青州福州河
南太原巴里坤各一人餘無定額舉非其人者論
如法入於計典官干六法者謂不謹以下六條五品以下
應否引

見由部疏請其應革職官罷任候

旨曾出征効力以老疾休致者審其資格覈其軍功量

予

恩俸有差如有原兼世職及世襲佐領者分別降留

又

上諭京城兵丁三年一次軍政考驗其優者列頭等賞給銀兩劣者斥革所以示勸懲也獨健銳營外火器營圓明園兵丁未入於考驗嗣後健銳營外火器營圓明園兵丁亦照京城兵丁例著派出軍政之王大臣一體考驗辦理

考察綠營武職鑾儀衛漢冠軍使至整儀尉由本營官注考達部京營千總以上直省營守備以上

以次聽察於其長冊注考語定以四格曰才技曰

年力曰馭兵曰給餉糾以八法

與八旗
考察同

京營由步

軍統領覈實達部直省綠營由總督巡撫提督覈
實具疏衛所千總由司道注考督撫覈疏薦舉必
以才技優長年力強壯馭兵有術給餉無虛又覈
其閱俸三年任內並無叅罰廼為合格其因公降
罷而廉能過人者除盜案處分外亦准其卓異合
格之遊擊以上引

見未滿三年者具奏請

旨已滿三年及都司以下均檄令送部引

見奉

旨准卓異注册候陞其既膺薦舉後至下次軍政時或因較俸尚未陞用如以考核列入平等者即將上次薦舉卓異加級注銷入於計典官如曾出征受傷著有勞績除犯貪酷外應革職休致者仍給原品其年老而精力未甚衰憊尚可辦事者或仍留

原任或調補簡缺該督撫提鎮酌量辦理請

旨遵行如果不堪錄用或子守糧一分或令子弟入伍
以養餘年又以二年半為期甄別綠營將備由督
撫提鎮各簡其所管副將及守備等官賢能合格
者陝甘舉五人直隸江南福建浙江湖廣四川廣
東各四人山東山西江西廣西雲南貴州各三人
河南二人及應劾之將備均具疏請

旨薦舉者予紀錄糾叅者准八法議處如值軍政之年

傳其甄別

三十七年八月

諭旗員補用綠營原以滿洲風俗淳樸技藝優嫻將伊等錄用自能為綠營表率以挽漢人習氣而外任所得養廉較多伊等所得既多亦於生計有益此朕教養滿洲奴僕之至意也伊等到任後理應謹守滿洲舊習以技藝為要多方教導毋染漢人習氣不行糜廢守分安常即至回京時僅可度日乃竟有在外全

忘滿洲舊習竟染漢人習氣凡事尚華不知搏節任意浮靡又甚至買妾置婢彼此效尤若年老無嗣置妾尚可無故為身體安逸做效而行此何理乎殊不知朕愛養滿洲奴僕之意著交八旗大臣通行曉諭所管應陞外省之侍衛章京官員等嗣後凡補放綠營人等到任後須謹守滿洲淳樸之舊習操演技藝毋效浮華靡費之惡習以作綠營人等之表率如不知悛改仍有似此者一經查出定行從重治罪著交

各省總督提督巡撫等除嚴行曉諭各員外留心細查如有故違者即據實叅奏毋得姑息

三十九年十一月

諭據周元禮奏查閱營伍情形摺內稱遵化州遊擊佛爾清額墻子路都司福英馬箭均欠純熟勒限半年學習再行考驗所辦非是旗員簡用外任原因緣營弓馬平常令其表率俾有所觀法咸成勁旅該員等自當感激朕恩並加奮勉身先倡率訓練兵丁學習

弓馬方為無忝委任若徒虛糜廩俸貪逸養安其于
滿洲體面盡失尚足為綠營標準乎今佛爾清額福
英馬箭均未純熟致被周元理看出則其生疎不堪
可知即不稱將領之任至綠營勒限半年學習舊例
在庸懦漢員偶一引用其知恥者尚當赧顏況滿洲
弓馬本所嫺習初用時皆經朕引見發往何以甫至
外任即盡行荒廢轉欲援綠營漢員之例學習稍有
人心者尚不知羞惡若此耶昨因直隸副將瑪爾清

阿遊擊武靈阿赴東省協勦賊匪頗能奮勉出力不
愧滿洲勇敢之風當即加恩陞擢用為總兵叅將若
佛爾清額福英之弓馬生疎豈可復為姑息佛爾清
額福英俱著即解任回京引見再降諭旨嗣後各省
綠營旗員如有弓馬生疎廢弛隊伍者均著照此例
辦理

巡防

凡巡防之制外海巡防

盛京以協領為總巡佐領防禦驍騎校為分巡直省
以總兵官為總巡副將以下為分巡各於所治界
內率舟師沿海上下更番往來以詰姦禁暴兩界
相交之所屆期會哨同時並聯名申報將軍總督
提督察覈委官稽查若因風汎阻滯或先或後各
以到界之日申報其期約以二四月為始至九
月事竣回營其有引避不巡及巡有不周者論如
軍律內河巡防長江自四川巫山而東出三江口

至湖廣界過岳州武昌興國至江西界下九江南
昌至江南界經安慶江寧京口狼山東至於海由
將軍督撫提鎮分委旗標弁兵沿沂江流上下遊
巡及交界之處會巡申報互相考覈與外海巡防
同若巡海遭風受傷者在外洋官准軍功加級兵
准一等傷給賞在內洋官准軍功紀錄兵准二等
傷給賞身故者在外洋官兵皆照陣亡之例在內
洋官照陣亡例減一等兵減半各給卹典若在黃

河大江及洞庭洪澤等湖遭風者視外洋賞卹各處墩臺營房

國初定邊境設立墩臺營房以司偵瞭遇有緊急舉烟為號寇至百人者挂席一領放礮一聲至三百人者挂席二領放礮二聲至五百人者挂席三領放礮三聲至千人者挂席五領放礮五聲至萬餘人者挂席七領連放礮聲接遞傳達

康熙七年題准各省孔道均設墩臺營房撥兵看

守如有緊急軍機接遞傳報

乾隆三年奉

旨各省水陸孔道之旁設立墩臺駐宿兵丁所以護衛行人稽查匪類朕聞外省情形種種不一其間兵卒成行器械成列於行李往來之時留心防護者有之防汛至二三人而不成行列器械不整者有之營房雖設而間其無人一任偷竊潛行漫無知覺者亦有大抵與督撫提鎮等駐劄大營相近者尚覺整齊

其速者即多廢弛夫防汛兵丁既無差操之勞專司稽察之事而乃怠惰縱逸至此則國家設立汛兵之意安在皆該管官弁約束不嚴董率不力有以致之其如何增設懲警之法令督撫提鎮等轉飭所屬將弁實心奉行俾各勤於執業不似從前之耽逸偷安任意曠誤著兵部定議具奏旋議定各省督撫提鎮將所屬地方詳細籌畫除汛兵已經足額者毋庸再行撥補外其有汛兵缺少之處各按地方衝僻

欽定四庫全書

多寶八刻通志
卷三十八

情形即行撥補所有器械務須整齊仍令該管官
不時察驗倘有離汎偷安曠誤汎防者將兵丁責
革別補該管官稽查不力者照約束不嚴例議處

欽定八旗通志卷三十八

欽定四庫全書

欽定八旗通志卷三十九

兵制志八

教閱

京營

直省

兵籍

京營

領侍衛府三旗親軍教閱之制鑲黃旗每月於初二十六兩日習騎射二次於初六十一二十一二十六等日習步射四次正黃旗每月於初三十七

兩日習騎射二次於初七十二二十二二十七等
日習步射四次正白旗每月於初四十八兩日習
騎射二次於初八十三二十三二十八等日習步
射四次

八旗驍騎營教閱之制每月於初四初八十三十
八二十三二十八等日習射六次都統以下各官
親往監視春秋二季撥甲習步射二次由旗定期
咨部撥甲習騎射二次由部定期通行又春月分

操二次合操一次秋月合操二次預奏操期仲春
孟秋之日按期登城習鳴螺兵部遣官稽察歲以
為常其八旗漢軍鳥槍兵於春秋月各演鳥槍四
十五日歲仍合操二次季秋月試礮於蘆溝橋每
旗各出礮十位演放五日間三歲則於蘆溝橋以
鳥槍營兵與礮營兵合演槍礮籐牌兵每年春秋
二季四旗合操四次八旗合操二次又於初冬分
派各旗演習步圍每年二次或三次

八旗前鋒營教閱之制每月於初二初六十一十六二十一二十六等日習步射六次春秋二季擲甲習騎射二次又於左右翼內各分前鋒之半兼習鳥槍月演十次均由統領督率所屬如法訓練每年秋季前鋒統領會同護軍統領奏聞率所屬兩營官軍演習步圍兩三次

八旗護軍營教閱之制每月於初二初六十一十六二十一二十六等日習步射六次春秋二季擲

甲習騎射二次與前鋒營同

圓明園八旗護軍營教閱之制每月習步射六次春秋二季習騎射演放鳥槍與八旗護軍營同

八旗步軍營及巡捕營教閱之制八旗步軍習步射城門驍騎習鳥槍均以春秋操演步軍翼尉同城門領更番考閱內九門外七門安設礮位每屆三年四門一次隨同八旗運往蘆溝橋輪流演放巡捕營叅將遊擊月考其屬之弓矢守備千把總

各練汛兵春秋習鳥槍與城門驍騎同

內府三旗教閱之制每月習射六次春秋二季擐甲習射二次每年立冬後內府護軍並尚虞處侍衛鷹狗房執事人等演習步圍又遴選三旗護軍學習馬射等技藝各以時操演

火器營教閱之制每月演習步射六日騎射六日馬上技藝六日各於本旗教場齊集其鳥槍礮護軍驍騎該管官按日於本旗公所考驗合操日八

旗分左右翼行陣施放槍礮九次至第十次礮與
鳥槍連環施放無間每年秋季俟八旗漢軍礮位
演放完竣後奏請往蘆溝橋演礮五日

健銳營教閱之制每月逢四九日期合操雲梯護
梯鳥槍大隊鳥槍馬上三槍過馬騙馬札槍貫跤
等技藝逢二七日期合操雲梯護梯鳥槍馬上三
槍及騎射步射舞鞭舞刀等技藝其餘日各於本
旗較馬步射施放鳥槍恭遇

駕駐圓明園自三月初一日起每日左右翼輪流演水
戰用船四逢八日期大操用船八若遇啟

駕巡幸行圍以後則按三八日期操演凡較閱每年自

七月十六日開操至次年四月十六日止若遇閏

七月即於閏七月十六日起其封開印信日暫停

八旗設立教場鑲黃旗教場在安定門外正黃旗

教場在德勝門外正白旗教場在東直門外鑲白

旗教場在朝陽門外正紅鑲紅兩旗教場均在阜

成門外正藍旗教場在崇文門外鑲藍旗教場在
宣武門外各設演武廳該都統等以時督率訓練
順治七年

世祖章皇帝諭我朝以武功開國頻年征討不臣所至克
捷皆恃騎射今荷

天庥天下一統勿以太平而忘武備尚其益習弓馬務造
精良

康熙十二年

聖祖仁皇帝諭漢軍不能騎馬者甚多每旗應設一營操練火器議政大臣等集議以聞尋議覆八旗漢軍鳥槍驍騎每佐領下增十八名共二十名演習鳥槍得旨火器關係武備甚為緊要應嚴加操演以裨實用

雍正五年

世宗憲皇帝諭火器營甚屬緊要馬上教習熟練方為有益凡屬滿洲以騎射為根本不可專習鳥槍而廢棄騎射兵丁在馬上射箭放槍著加意熟習再兵丁內有自

已養馬學習鳥槍技藝及勤謹効力當差者爾等即當
勸勉以優等記名其或行走不及者亦當誘之于善教
訓兵丁須如教訓自己子弟不可遽加苛責若有下愚
不移之人或經再三教訓仍然行止妄亂者豈可留之
京師爾等當即行奏聞發遣

十年

諭兵可百年不用不可一日不備帝王之治天下未有不
以武備為先務者而兵丁之演習武藝亦未有不勤加

訓練而能有成者從來士農工商各習一業苟不專心竭力則其業必不精況兵丁所司戰鬪之事非膂力剛強不能披堅執銳非習藝嫺熟不能克敵宣威奈何怠惰苟安虛度歲月不思設兵之本意不意己身之職業乎國家承平日久人耽安逸武備漸覺廢弛今當邊陲用兵是以令勤操演又不令值班俾得專心訓練復給以飯銀資其日用無非體恤勤勞也爾等各宜勉力學習如騎射長槍之類必令純熟精強成國家之勁旅以

柔弱怯懦為恥以安逸華麗為戒人之力量用則日增
不用則日減如出城操演正可演習步行又何必騎馬
乘車若此等者一經察出必從重治罪

乾隆三年

上諭聞得護軍披甲旗人內有不肖之徒入班唱戲者
亦有不入戲班自行演唱者既係旗人自當勤習騎
射清話武藝乃入此等卑習罔顧身名是何道理朕
昨較獵南苑見兵丁於行圍之道及馬上甚屬生疎

不堪此皆平日不勤習武藝沉於戲玩之所致也八旗大臣前鋒統領護軍統領等均有教育旗人之責乃平日並不將該管人等留心稽查約束以致如此放蕩著交各該管大臣等嗣後將此等之人務必嚴查約束倘仍不留心致使旗人不習武藝任其流入此等卑習或經朕訪聞或被叅劾朕惟該管大臣等是問並著步軍統領亦嚴加察拿又

上諭八旗弁兵等蒙

皇祖六十一年教養之恩不啻天高地厚我

皇考臨御十三年宵旰焦勞施恩沛澤為旗人籌畫生計

者至周至渥朕即位以來仰體

皇祖

皇考聖心無時無刻不以瞻養旗人為念凡有益於伊等
生計者悉已次第舉行即如近年之中借給餉銀數
百萬兩原議按月扣除未幾仍行豁免在國帑所費
已多而於旗人究未能永遠補益今再四思維八旗

生齒日見其繁若於每佐領下各添兵額則食糧者
加增於原數而閒曠者自少似為養贍旗人之本計
除各王公屬下包衣外查八旗滿洲蒙古現有十六
歲以上壯丁七千六百餘名五歲以下幼丁一萬六
千四百餘名漢軍壯丁現有二萬五千一百餘名幼
丁七千一百餘名又圓明園八旗壯丁現有五百餘
名幼丁一千餘名共計五萬七千九百餘名著將滿
洲蒙古佐領共八百八十二個每佐領添食四兩之

護軍一名領催一名食三兩之馬甲二名食二兩之
養育兵十名圓明園八旗每旗添養育兵四十二名
至於漢軍佐領共二百七十個半伊等人丁雖衆其
中力能營運者尚多且佐雜千把皆可錄用與滿洲
蒙古不同今酌量每佐領添領催一名馬甲二名養
育兵六名通計加添護軍領催馬甲四千三百三十
餘名養育兵一萬七百七十餘名每歲需銀四十三
萬九千餘兩需米九萬六千三百餘石至於八旗佐

領人數多少不一若照額加添或佐領人數不敷或
有人丁而不願披甲者應於人多之佐領下挑補其
如何辦理妥協之處著軍機大臣會同議政王大臣
八旗大臣詳加妥議具奏此朕逾格加恩之舉旗人
等當思國家之經費有常弁兵之額數有定將來生
齒愈繁豈能更有增益朝廷曠典不可屢邀惟有謹
身節用崇儉去奢以為仰事俯育之道不至匱乏則
朕之施恩為不虛而旗人亦永享安寧之福矣

四年

上諭滿洲兵丁素以騎射馬上技藝甚為緊要是以奮勉習學該管大臣官員等亦留心訓練滿洲兵技藝甚屬強健遠過綠營兵丁今滿洲兵丁為習俗所染惟好安逸不甚演習技藝該管將軍大臣等又不以操演為事技藝漸至廢弛遠不及先矣今聞四川撫標親隨兵丁之缺例應以滿洲兵丁內挑取經四川副都統永寧以補巡撫親隨馬甲之缺由滿洲兵丁

內挑選五人送往該撫挑取令各射步箭二枝並無
一人射中者至副都統永寧原有管束兵丁訓練熟
習之責今兵丁技藝如此生疎皆伊平日不留心訓
練所致於滿洲風氣大有關係永寧著嚴加申飭務
須將兵丁等留心訓練俾各致精銳若仍似此疎懈
不以為事經朕查知必行治罪據四川省如此其他
省駐防兵丁亦恐如此著通咨各省駐防將軍副都
統等各加奮勉訓練不得怠玩

五年

上諭塞爾德陽泰身為副都統不以公務為事又致令
行私作弊實負朕恩著革職交刑部議處具奏協領
蘇通阿等亦行私作弊著交兵部嚴察議奏其辦理
不明之協領鐵圖等及將家生子挑甲之該管官員
理應交部察議但人數衆多且伊等亦係遵塞爾德
陽泰之言而行者俱著從寬免其交部將軍係一省
大臣理應如是辦理恩施出自朕躬嗣後右衛官兵

若感戴朕恩遵奉將軍法令改過急公竭力行走不
但於爾等生計有益亦可永受朕恩該部知道又

上諭內扎薩克之六會所備兵丁及軍器已連閱三年
因伊等預備操練甚好是以此次朕加恩賞賚派出
備兵之王貝勒台吉官兵今準噶爾噶爾旦策零甚
屬恭順諸凡俱照朕所指示而定並無事故若每年
仍派大臣前往查閱蒙古等預備馬匹牲餽往返行
走未免勞苦嗣後每年派大臣之處著停止俟二三

年後理藩院將派大臣前往查閱之處具奏請旨爾等可曉諭派出備兵之王貝勒台吉官員等將各會兵丁仍不時操練俾軍器銛利整齊以副朕體恤伊等之至意毋謂暫不查閱即行急急伊等若稍怠忽致兵丁訓練荒疎軍器虧缺不全一經派往查閱大臣叅奏朕斷不寬恕著特此明白曉諭又

上諭八旗兵丁赴蘆溝橋演槍砲定例三年一次於九月內舉行兵丁人等雖預領有本月分錢糧但家間

養贍與在橋日費不能兼顧未免拮据今屆操演之期朕心軫念著照訓練營舊例賞給一月飯銀以示優恤再應用帳房亦著照訓練營之例赴工部關領俾營制齊一以肅觀瞻仍交該管官於完操之日查明繳部嗣後三年一次赴橋操演俱著照此例行

六年

上諭朕行圍回京之後恭讀

太宗皇帝實錄內載昔

太祖時我等聞明日出獵即預為調鷹蹴毬若不令往得請隨行今之子弟惟務出外遊行間居戲樂在昔時無論長幼争相奮勵皆以行兵出獵為喜爾時僕從甚少人各牧馬披鞍析薪自爨如此艱辛尚各為主効力國勢之隆非由此勞瘁而致乎今子弟遇行兵出獵或言妻子有疾或以家事為辭者多矣不思勇往奮發而惟耽戀室家偷安習玩國事能無衰乎此等流弊有關於滿洲風氣是以蒙

太宗皇帝諄切訓諭朕此次行圍諸王大臣中竟有耽戀
室家托故不願隨往者朕已為姑容亦不必明指其
人夫行圍出獵既以操練技藝鍊習勞苦尤足以奮
發人之氣志乃滿洲等應行勇往之事若惟事偷安
不知愧恥則積習相沿實於國勢之隆替甚為關係
嗣後倘有不知悛改仍蹈前轍者朕斷不輕為寬宥
可通行諸王大臣及官兵人等知之

七年

上諭向來直隸山西沿邊副叅將等缺准以侍衛章京等員補用原以滿員騎射素優防禦關隘自屬相宜而於綠營旗營伍恐未能周知是以止將邊缺補用朕思直隸一省為京畿重地所有營汛均屬緊要若將已任邊關將備滿員之內擇其通曉營務者調補內地以在京滿員補用邊缺則於職守既無遺悞而滿員亦得藉此疏通向來沿邊副叅等缺以三分補用綠旗以七分補用滿員今內地副叅等缺應酌以

七分補用綠旗以三分補用滿員在綠旗將弁原於各省通行陞轉非若滿員之有界限分缺無多實無佔礙之虞而滿員歷任邊疆留心營伍亦收駕輕就熟之益其如何分缺揀補及如何定例題陞之處該部詳悉妥議具奏

十年

上諭國家養育兵丁將責以披堅執銳陷陣摧鋒之用故當召募之始必擇其身材強壯技藝可觀者方准

入伍朕聞外省兵糧缺出惟馬糧係督撫提鎮親行
拔補至步糧則由營員驗放因而徇情示惠徃徃將
猥弱不堪之人混行收錄虛糜糧餉者有之又向例
兵糧缺出先儘餘丁頂補餘丁不足始募民人充伍
查餘丁一項原係將營中清出火糧收養兵丁子弟
每名月給餉銀五錢既可貼補兵丁之不足且以造
就人材立法本非不善乃兵丁因餉銀有限凡子弟
之壯大者多令別業資生而以幼小羸弱之丁充補

其數徒然佔食半餉難以造就人材國家何能收養
兵之實用直省督撫提鎮等宜思設兵者經國要畧
簡募者教練先資既往者姑不究茲後遇有兵糧缺
出無論馬步戰守餘丁務須親自驗收不可憚勞委
之營弁倘一時事冗不能親閱亦必令親信大員代
看庶有一兵即得一兵之用於詰戎之道方有裨益
其不實力奉行或經科道查叅必重處不貸該部即
遵諭通行又

上諭八旗前鋒護軍等三年考驗一次原恐該管大臣等不勤加訓練漸至疎懶是以特派王大臣等閱看分別等第以示懲勸自此例定後已經驗看二次勸優懲劣各知奮勉此次考驗著暫行停止交該管大臣章京等不時勤加訓練勿致臨時竭蹶並曉諭兵丁等令其平素勤習務期騎射技藝各極精熟俟下次考驗出派王大臣閱看時遇有庸劣者朕惟該管大臣章京等是問又

上諭國家設立營伍修明武備所為折衝禦侮之用必
訓練精熟於平日斯可奮勇決勝於臨時是以陸路
設營汛沿海設水師皆須勤演習收實效者自去年
朕命大臣查閱營伍後陸路該管大員頗有竭力整
頓氣象而水師操演則不過將演就陣法塞責了事
其操舟破浪之法官弁兵丁茫然不知以為此水手
之事漫不留意即至舵工水手其能熟練者亦屬寥
寥平日操演之時各船進退尚且參差往來間斷苟

其臨敵何以致用夫水師以舟為主出沒風濤去來
倏忽必掌舵者能操縱自如而搶風折艤破浪冲波
水手等盡能嫻習即官弁兵丁等亦皆心領神會不
待呼應而自靈然後猝然遇敵駕駛輕捷一舟之中
臂指相使如一人之身則應變制勝無難向來水師
員弁仍以水師用原欲其熟悉情形收得人之效今
則視為故套該管者不加察徼倖者苟延玩是育材
之善政為伊等之捷徑矣著通行申飭沿海將軍督

撫都統提鎮等務遵朕旨實心訓練實心甄別毋得
仍前玩忽虛應故事又

上諭八旗滿洲舊習原以操練騎射技藝為要兵丁內
擇其善者挑為前鋒護軍訓演操練俾至勇健實欲
我滿洲舊習不致荒廢凡有差役之處不落人後耳
故每月六次步射春秋騎射三年一次考驗成例具
在使兵丁盡善盡美練至勇健者皆賴該管大臣章
京等盡心訓導乃此數年來朕嘗恐舊業荒廢屢申

訓諭今見前鋒營兵丁尚屬可觀而護軍營兵丁該管大臣章京等平素甚不以訓教為要務視操演如故事兵丁等亦惟求安逸並不勤習直至考驗之時始各勉力習學似此懈怠舊習必至漸廢兵丁如何尚能勇健護軍統領等實負朕簡用之恩著嚴加訓飭嗣後務循舊例親往操演指教兵丁即視如子弟力回惡習以期技藝純熟倘再似此懈怠不勤經朕察出必將該管大臣官員及兵丁等治罪決不寬貸

將此通諭知之又

上諭八旗兵丁習學騎射技藝甚屬要務從前考射前鋒護軍等以示懲勸優者已加恩賞賚矣驍騎營兵丁未經增入此項考驗之列今將八旗滿洲蒙古漢軍上三旗色衣佐領護軍校驍騎校親軍前鋒護軍領催馬甲拜唐阿等特出派王大臣與該管大臣公同考驗射布把其中三枝以上者分別記名中數不及而樣式好或弓硬而骨幹強健者亦令取記再年

邁殘疾不能射箭然久於營伍抑曾効力行間平素
步射差務較好現不獲入考者各該管大臣詳細聲
明亦著增入俟朕閱後酌量賞賚庶幾可望兵丁互
相鼓舞優者愈加勤勉而劣者亦知奮發學習皆底
於善所有派出王大臣等即行考閱分別等第將各
記名數目交軍機處彙奏

十一年

上諭適閱前鋒統領護軍統領帶領引見之兵丁弓力

甚軟且射法生疎撒放亦不清楚箭出均未能至把
即落於地滿洲人等騎射本為要務今朕步射之弓
力不甚勁不過六七十力然尚能貫把者亦由撒放耳
前鋒護軍等皆係精銳之兵有如是射箭之理乎前
鋒統領護軍統領等並無別辦事件專司訓練兵丁
宜念我朝根本盡職勤練俾兵丁等各皆精銳試思
引見之人皆係遴選技優者不過如是其餘尚可觀
乎此皆該管大臣章京等平素怠玩並不訓練所致

朕從前已降旨申飭此次復從寬免其治罪將此傳諭伊等嗣後務各實力訓練以期盡善若仍是怠惰不加勤勉朕斷不寬宥必將該管大臣章京等一體治罪至該都統等皆藉事辦理旗務並不將馬甲等騎射為事射箭之日亦不過令其一箭塞責並不留心訓練釀成怠玩之習且伊等有何應辦之事職司管兵可不以教育為務乎著嚴行申飭

十二年

上諭據八旗護軍統領奏稱定例內護軍校缺出俱視其本佐領有出過兵年陳者揀選補授但此十數年間將曾在軍前出力保舉人員俱已用完今所餘者雖係有兵並無別項勞績且又已逾年歲騎射平常者多伊等仗賴必至陞階而以騎射竟不為事差使亦不奮勉安於苟且從事其次應陞著有勞績少年人等亦思伊等之前有人已身暫不能陞進而不肯奮力効勉者有之嗣後補放護軍校時本佐領年陳

有兵之人員內如有優者仍著揀選補放外如雖係有兵而並無別項勞績且騎射生疎人亦平庸者即裁除其名以其次應陞人員內惟以騎射尚優並能管轄差使勤奮者揀選補放等語但護軍校有管教護軍之責且係精銳之營當以其人去得足以管轄者揀選補用今據護軍統領等現在陞用其餘有兵人員內甚不得人請另行通融辦理等語所奏甚是著照伊等所請辦理至前鋒統領圓明園護軍營亦

著照此辦理但諸事有一利即生一弊今既如此更
定後人去得騎射優者固屬可得然奉行日久漸滋
瞻徇迴護之弊將曾經出征人員內尚可陞進而竟
裁除以至冤枉者亦所不免如辦理不公有以不應
裁除者任意裁除以不應陞之人徇情揀選補放者
准其被曲之人赴領侍衛內大臣前出首其內大臣
等奏聞時朕另派大臣查辦朕特派大臣等豈又瞻
徇情面耶必然秉公查辦設或並無被曲而圖倖進

濫行誣告者必嚴責治罪朕降此諭旨特為預防滋弊以得用人之公而軍前効力之人不致冤枉之意其中如有無知之人希圖倖進以長控告之習乃不應控告者濫行控告仍照定律治罪著通行曉諭大臣官員以及各兵丁等知之

十四年

上諭去歲金川用兵朕思我滿洲兵向用雲梯攻城因命八旗於前鋒護軍內擇年壯人材勇健者千人特

命大臣監視操演所選兵各奮勉學習不數月間皆已精練隨征金川功成凱旋如令仍回本營隨旗行走則伊等前功徒費且我滿洲舊日技藝仍至廢弛若將伊等專設一營演習均可為精銳兵於緩急之用更有裨益遇有行幸令伊等隨往圍獵學習行走更得嫻熟俟回軍之日不必令回本營專令大臣數人管轄特簡大臣一人總統其如何設營伍操演遇行幸隨蹕再如何施恩使得陞轉之途著大學士公

同管轄操演之大臣等詳議具奏尋議准設立健銳
營雲梯兵一千名專習雲梯鳥槍馬步射馳馬躍
馬舞鞭舞刀諸技又於昆明湖設趕繒船以前鋒
軍習水戰駕船駛風之技

十五年

上諭朕前降旨沿邊及直隸地方營協叅用八旗滿洲
人員原因滿員弓馬素優人材驍勁習於勞苦整頓
營伍是其所長是以令其分缺補用今行之數年邊

方營伍漸次整飭而滿員之於外任相宜者亦俱經擢用嗣後綠營分用滿員所有都司以上各缺應令稍為裁減俾得其平至文員選用道府按俸推陞另立班次行之既久部院之能辦事者亦俱以俸次陸續外補該堂官雖欲留之而不可得夫內用外用均為國家任事之職而為滿為漢在朕初無町畦高下之見雖朕因材器使自可不拘成格若其著為定例遵循者又當隨時斟酌以核人材而均銓政著吏兵

二部查明滿員外用分班分缺定例量加裁酌另行
詳悉定議具奏又

上諭滿洲舊習惟以馬步射清語為要前因侍衛及八
旗武官步箭庸劣往往有半不到地出溜者經朕節
次降旨訓飭大臣等理當仰副朕旨毋致廢棄滿洲
舊習善為盡心訓練官兵本日領侍衛內大臣前鋒
統領護軍統領等帶領引見人員內多有步箭庸劣
半不到地出溜者此皆弓軟步射生疎之所致也至

侍衛等尤非尋常武員可比更宜以馬步射為要若如此可乎此次朕惟將該管大臣及侍衛等治以罰俸處分並未從重治罪嗣後引見人員內仍有似此者被朕查見時朕必將該管大臣等從重治罪將該員即時懲責斷不寬宥至朕時常演射行圍原為令官員兵丁等習學田獵恐將滿洲舊習荒廢特欲整飭之意耳若計安逸朕在宮庭花苑內何樂不得朕尚不圖安逸以身率先各都統等除訓練官兵之外

伊等又有何事辦理朕如此屢降諭旨訓飭伊等反
不輔朕以復滿洲舊習訓練官兵此與違背朕旨何
異有是理乎再補放武員但視其騎射馬步技藝而
已並不賴伊等辦事又何必論其聰明辦事可否耶
嗣後帶領侍衛武官等引見時朕但視其馬步射清
語優長者錄用若技藝庸劣雖人去得朕亦不用將
此通行傳諭領侍衛內大臣前鋒統領護軍統領八
旗都統等務體朕意各將所屬官員兵丁訓練以期

優長朕如此開導訓諭而伊等仍照前不以為事此即有意背旨自尋其辜仍望朕施恩寬貸可乎慎之勉之特諭又

上諭朕前因綠旗營伍廢弛兵力軟弱皆由將弁不能約束訓練所致是以分用滿員以資鈐轄邇來因簡用過多業將遊擊以下之缺量加酌減今觀侍衛協領叅領等人員內才具稍優者皆已陸續外用副叅等缺仍屬過多旗員內漸少出色之人而綠旗員缺

亦未免稍偏朕因材器使內外原屬一體但隨時委用輕重務在合宜自應量為調劑且向來滿員內任者即藍翎侍衛亦皆以為榮初無欣羨外任之意若樂於外任可以偷安且多得俸薪則所見卑鄙已甚滿洲淳樸之風當不出此總之操縱在朕向之多用綠旗不可嘆向隅今之簡用滿洲不可嘆阻塗所有分缺簡用之處該部另行定議具奏

十六年

上諭侍衛等乃武員之表率騎射尤為緊要去歲因侍衛等步射庸劣業經降旨儆飭皆已治罪本日引見之侍衛等步射仍屬庸劣多有半不到地出溜者是何道理其步射庸劣之哈魯等十四員交領侍衛內大臣嚴加議處具奏至領侍衛內大臣本係專任管教侍衛之人平時並不善為訓練以致如此庸劣甚屬怠惰將領侍衛內大臣等俱交部查議即如奇通阿豐安伊等更有何事並不將侍衛等盡心訓練尤

屬非是著將竒通阿豐安嚴加查議具奏

十七年

上諭朕恭閱

太宗文皇帝實錄內載崇德元年十一月癸丑日

上御翔鳳樓集諸親王郡王貝勒固山額真都察院官命

宏文院大臣讀大金世宗本紀

上諭衆曰爾等審聽之世宗者蒙古漢人諸國聲名顯著之賢君也故當時後世咸稱為小堯舜朕批覽此書悉

其梗概殊覺心往神馳耳目倍加明快不勝嘆賞朕思金太祖太宗法度詳明可垂久遠至熙宗合剌及完顏亮之世盡廢之耽於酒色盤樂無度效漢人之陋習世宗即位奮圖法祖勤求治理惟恐子孫仍效漢俗預為禁約屢以無忘祖宗為訓衣服語言悉遵舊制時時練習騎射以備武功雖垂訓如此後世之君漸至懈怠忘其騎射至於哀宗社稷傾危國遂滅亡乃知凡為君者耽於酒色未有不亡者也先時儒臣巴克什達海庫爾

纏屢勸朕改滿洲衣冠效漢人服飾制度朕不從輒以
為朕不納諫朕試設為比喻如我等於此聚集寬衣大
袖左佩矢右挾弓忽遇碩翁科羅巴圖魯勞薩挺身突
入我等能禦之乎若廢騎射寬衣大袖待他人割肉而
後食與尚左手之人何以異耶朕發此言實為子孫萬
世之計也在朕身豈有更變之理恐日後子孫忘舊制
廢騎射以效漢俗故常切此慮耳我國士卒初有幾何
因嫻於騎射所以野戰則克攻城則取天下人稱我兵

曰立則不動搖進則不回顧威兵震懾莫與爭鋒此番
往征燕兵出邊我之兵威竟為八大臣所累矣故諭爾
等其謹識朕言欽此朕每敬讀

聖謨不勝欽凜感慕深惟國家開創之時我

祖宗躬親勞瘁勤求治理矩矱相傳罔敢渝越以立萬世
之丕基至於今感受無疆之福者皆仰遵

明訓所致也我朝滿洲先正遺風自當永遠遵循守而勿
替是以朕常躬率八旗臣僕行圍較獵時時以學習

國語熟練騎射操演技勇諄切訓誨無非率由舊章
期以傳之奕禩永綿福祚惟是我

皇祖太宗聖訓所垂載在

實錄若非刊刻宣示則累朝相傳之家法外庭臣僕何由
共悉且自古顯謨令典多泐之金石曉諭羣工我

皇祖太宗之聖睿特申誥誡昭示來茲益當敬勒貞珉永
垂法守著于紫禁箭亭御園引見樓及侍衛教場八
旗教場各立碑刊刻以昭朕紹述推廣至意俾我後

世子孫臣庶咸知滿洲舊制敬謹遵循學習騎射嫻熟國語敦崇淳樸屏去浮華毋或稍有怠惰式克欽承

彝訓冀億萬世子孫共享無疆之庥焉特諭又

上諭自設立健銳營遴選兵弁並駐劄以來教演技藝甚多今又練習水戰自應獎勵著施恩賞予養育兵缺一百名於伊等子弟內挑取以資生計又

上諭看來八旗世襲官員內並不學習清語騎射庸劣

不堪者甚多皆由幼時襲官賴有俸養惟求安逸該都統等又不勸勉教訓所致此項官職皆伊等祖父宣力所得伊等承襲後因年未及歲即聞散安逸並不學習正事恣意流蕩遂成無用之人若令其當差伊等亦得長進其年已及歲之官亦多旗下差務無多惟以安逸為事及挑選侍衛時俱退避不前著將此等一併揀選分與護軍營按伊等品級在章京護軍校護軍上兼行並勉力教演騎射若果行走勤奮

即奏補實缺伊等藉此學習亦屬教養幼穉之道應如何分派差使行走補用令于旗差足數有餘之處著軍機大臣會同八旗都統前鋒統領護軍統領議奏又

上諭馬步騎射係我滿洲最要之材技今旗下人等皆安於逸樂並不以此為要勤加習學且亦不知先輩時技藝不能如人即大愧恥務求至善故朕力革流習遵循舊制每每身先操演騎射率衆行圍不憚勞

瘁又令各宜務期至善所降諭旨甚多是以因朕常
閱步射尚知畏懼畧加學習若無朕前射箭之事則
益不以為事而該都統亦並不董率勤習矣將此傳
諭領侍衛內大臣八旗都統前鋒統領護軍統領等
嗣後武職官員內凡陞調及世襲子引見時除向來
看視步箭不議外其引見向不射箭之補放印務章
京人等並侍班引見官員亦俱著射箭又

上諭護軍前鋒皆係精銳之兵弓馬騎射乃我滿洲至

要之材技必須鼓舞教訓不時操演以臻精銳護軍
前鋒等每月雖有一定射箭日期然該管大臣官員
等視為故事未必悉力教演至三年一次欽派王大
臣驗看軍政雖係獎優懲劣之例但為期甚遠伊等
亦不過臨期鹵莽操演一經驗看過後仍復荒棄便
不勤習豈能至于嫻熟從前

皇考思及兵丁騎射最關緊要曾特降

諭將前鋒護軍挑選引見並有獎賞錄用者亦有因庸劣

不堪致將該旗都統等責處治罪者此特教養兵丁之道著交前鋒統領護軍統領等護軍校前鋒護軍內有材堪造就騎射優長每翼挑選前鋒校各十名前鋒二百名上三旗每旗各挑選護軍校二十名護軍二百名下五旗每旗各挑選護軍校十五名護軍一百五十名請旨欽派王大臣閱看此內如有上好前鋒校前鋒著於每翼揀選十五名護軍校護軍每旗著揀選十名奏請引見如此則兵丁等互相鼓舞

演習技藝而亦可視該都統等董飭之賢否以定功過矣嗣後以此為例按年俱如此辦理本年於朕哨圍回鑾後著前鋒統領護軍統領等即行遵照揀選請旨欽派王大臣閱看又

上諭八旗世職官員皆係承襲伊等先人宣力所得之職現食俸祿除旗下官差外並無操演之處惟安於逸樂遂至清語技藝均屬不堪朕曾降旨將尚可造就之人揀選引見其有出色者挑取侍衛中平者令

在護軍營當差清語騎射皆令演習此特軫念伊等
先人勤勞教養旗僕之意但此等引見人員皆係揀
選八旗才具優長者其內如有不堪者尚應革退令
別人承襲其旗差行走之世職官員內庸劣之人因
不令引見反不勤學此特導之漸染惡習耳況滿洲
世僕並非伊等自身宣力所得之官不過承襲世職
即因不能清語騎射革退令別人承襲實屬分所應
得原議殊未詳盡此等旗差行走之世職恩蔭等官

應如何考驗並此次考驗後應如何作為常例之處
著交八旗都統另行議奏又

上諭向例八旗兵丁軍械每年出派王大臣查驗一次
但每年查驗殊覺繁冗兵丁亦屬多費嗣後著三年
一次查驗朕今已展查驗限期如屆查驗之年派出
王大臣斷不可仍前塞責了事務須詳細實心查驗
倘仍不以為事朕必親身閱兵若閱兵時有不齊者
必將王大臣治罪決不姑貸其查驗時除八旗驍騎

營官員兵丁及前鋒護軍色衣護軍著仍照例查驗
外其色衣佐領下馬甲及王屬色衣兵丁之軍械俱
著無庸查驗又

上諭八旗滿洲官員原俱在城內居住即偶有年老告
退之人移於京城左近墳塋地方居住尚可至南城
外皆係漢大臣官員住居之所滿洲官員不應在彼
居住今聞滿洲官員內亦有移在南城外居住者殊
屬不合著交八旗都統嚴行飭禁現住之人俱令移

居城內並著派御前大臣及侍衛等會同巡城御史
將現在南城外居住滿洲皆係何人並係何等官職
查明奏聞又

上諭旗員步射一端甚關緊要朕節經降旨曉諭從前
已有因護軍營射箭致護軍統領俱被飭責者之八
旗都統寧不知耶豈以護軍前鋒始操演步射旗下
官員即不當操演步射乎本日正藍旗滿洲旗分帶
領引見官員看來步箭多有半不到者是何道理實

屬不堪八旗都統了無事務於官員等步射自應教
演似此因循廢弛伊等皆所司何事將此著通行傳
諭八旗王大臣嗣後旗員步射如再有似此半不到
者惟伊等是問又

上諭騎射國語乃滿洲之根本旗人之要務朕今歲校
閱京城世爵其射箭尚可觀及人材英俊者已施恩
選取侍衛並分在各處令其學習行走其射箭甚劣
不堪教化者察明革職別行承襲至各省駐防亦皆

有世爵若不教訓騎射國語伊等近于素餐安逸之
習必致學為不善著各省將軍都統等將伊等不時
教導務使騎射優嫻國語純熟如有教訓不化騎射
甚劣者該將軍都統等即指名叅奏革職別行承襲
將此通諭知之又

上諭因八旗世職多有自幼承襲惟耽於安逸將騎射
技藝不以為事故經朕降旨令將尚可觀者帶領引
見分在各處學習行走其餘庸劣者八旗都統等請

限訓練令其陸續帶領引見此特朕軫念伊等先人
勤勞教養旗僕之意今引見訓練之世職等看來皆
不過平等而已並未有練至優長者但此係初次朕
亦不究姑從寬貸其稍有傑出見長者仍記名獎勵
其甚屬不堪者始革退二人俟再逾三年朕仍閱看
彼時仍如此等情形斷不寬恕令伊等務須加意勤
習八旗都統等皆有教養旗人之責平日若將旗員
視如子弟加意訓練騎射何致生疎况演習射藝清

語既無閒曠之暇不致遊蕩亦於伊等生計稍有裨益此次尚屬平等姑容從事嗣後都統等若仍不以為事至朕閱看之時方趕緊教演一經查獲不得怨悔也將此著通行傳諭八旗再此次世職官員以朕閱看各將技藝趕緊演習俱至平等矣看來尚知悛改可期造就其中經朕記名者著賞緞三疋著該都統等再行帶領引見除其革職及因有事故未經引見之官員外其餘人員俱著加恩各賞緞二疋又

上諭八旗世職官員亦同職任官列入軍政一體填註
才守皆屬虛名並非實據該員等惟應計其騎射技
藝平時當差如何耳嗣後八旗世職官員免其入于
軍政著該都統等三年一次帶領引見于引見時將
其平時當差如何之處一併聲明將此著永為令

十九年

上諭旗員外補綠營蓋以八旗營兵素為嚴肅而旗員
嫻熟騎射訓練整飭自足以表率士卒乃近來外任

武職旗員來京引見者弓馬率多平常竟與綠營官
弁舉動相似即奏對履歷清語亦覺生疎是不獨不
能振別戎行而轉濡染其陋習此豈簡用之本意嗣
後務當各加奮勉留心學習倘仍耽於安逸一膺外
任遂置弓馬於不問以致平時技藝漸就荒廢該督
撫提鎮等即行據實叅奏兵部堂官有本兵之責於
堂考時亦當慎加甄別但如堂考綠營官弁視為奉
行故事而已總之旗人騎射是其本務不得與綠營

比况膺將領之寄將為標營準則者乎可將此旨通行傳諭凡外任武職旗員令其各錄一道懸之公署其部推新任者即由兵部謄錄俾領赴任晨夕觀瞻知所警戒

二十一年

上諭昨據前鋒統領護軍統領等帶領引見人內因多有胡亂挑射或不到箭把擦地而去者經朕申飭將前鋒統領護軍統領等交部察議矣今日兵部帶領

引見副都統記名人員內護軍叅領滿丕等三人步射平常未到箭把甚屬不堪朕已將伊等戒飭但護軍叅領除進班外更有何事時常勤習馬步箭清語是伊本等要務伊等果將此等武藝為要務須演習可為兵丁法則而伊等步射亦不致平常矣此等步射平常者皆由平素並不勤習至引見時始急忙上緊所致前鋒統領護軍統領等所司何事伊等果於平素嚴飭該叅領等令其各自勤習不時親看演射

何至如此耶此又非難事朕屢經嚴行飭諭仍有如此者皆由前鋒統領護軍統領等自取朕之咎責也但此次只責懲步射平常者嗣後若復如此經朕查出必將該管前鋒統領護軍統領等一併飭責決不寬宥著通示前鋒統領護軍統領又

上諭從前朕以滿洲習氣純樸而騎射步箭優長較之漢人實為精強能耐勞苦可為綠旗官兵儀型是以加恩將滿洲陸續陞用綠營其陞用之人宜感戴朕

思用心勤習馬步騎射滿洲國語為各該管官兵儀
型今看來陞用綠營人員並不勤習馬步騎射只圖
安逸差使無多遂致廢棄武藝生疎或有不及綠營
人員者似此光景朕用伊等何為尚可為漢人儀範
耶是以朕從前曾降有諭旨著交兵部將朕從前所
降諭旨並此次諭旨皆彙寫鐫板通飭遵行嗣後遇
有補授綠營官員即刷給一分令其不致廢棄滿洲
舊習用心勤演馬步騎射滿洲國語倘伊等仍不勤

勉不以演習武藝為事朕必加重懲治決不姑貸

二十二年

上諭外省駐防將軍及綠營之提鎮出行則皆乘輿夫將軍提鎮有總領官兵之責若養尊處優自圖安逸亦何以表率行伍而作其勇敢之氣况旗人幼習騎射即綠營中亦必以其弓馬優嫻始歷加陞用乃一至大僚轉至狃於便安忘其故步此豈國家簡擢之意耶京師都統副都統既皆乘馬而滿洲侍郎則無

論年逾六旬亦俱不得乘輿即朕巡省所至尚每日乘馬而行乃外省武職獨相沿陋習此甚非宜嗣後將軍提鎮概不許乘輿其編設轎夫并著裁革如有仍行乘坐者照違制律治罪可通行傳諭知之

二十五年

上諭馬步射清語係滿洲根本甚為緊要前曾降旨所有八旗散職官員每三年閱看一次今歲正值閱看伊等之期已按旗閱看矣其中稍可造就之子爵伯

清額等三十二人令在侍衛上行走輕車都尉嵩山等四十一人令在護軍營行走輕車都尉李文貴等九人令在鑾儀衛行走其餘人員內不惟步射好清語熟者甚少竟有步射甚劣不能清語者滿洲人氏於馬步射清語皆屬分內應學之事散職官員除進班之外並無別項差務益當勤學且間二三年始閱看一次即使庸劣者習二三年後尚有不工之理乎此皆平素希圖安逸不肯勤學而該管大臣又不嚴

加教訓所致其習甚惡若不力為整飭相沿日久必致滿洲故業盡失除其中稍可者朕皆姑容辦理外輕車都尉劉文靖騎都尉富柱長在登保雲騎尉闕柱堆清額恩騎尉王至誠三官保步箭甚劣不能清語本應將伊等罷黜警衆今特施恩此次暫行寬免俱罰俸一年嗣後旗員等務須上緊勤學馬步射清語各該管上司亦不時教演倘仍前怠惰不學及該管大臣等不嚴加教訓至下次閱看時仍復如此朕

決不輕貸

二十六年

上諭馬步騎射乃滿洲舊務至前鋒護軍俱係精兵尤當熟練今屆期考驗八旗前鋒護軍等騎射朕特派王大臣考驗其中騎射生疎者均宜治罪但近年前鋒護軍等因無曾拴馬伊等未得演習其中恐有馬箭生疎者如驗看生疎不得不治其罪如治其罪伊等無曾拴馬未得演習情又可恕著加恩此次考驗

前鋒護軍時不必驗看馬箭惟驗看步箭如步箭生
疎斷不寬恕必責懲示衆昨於前鋒護軍營均已賞
給馬匹拴養此際該管大臣官員等必令伊等勤勉
訓練如伊等不肯勤學該管官員又不肯努力訓誨
至下次驗看時仍有生疎者不惟將兵丁治罪將該
管大臣官員等一併治罪再考驗伊等分作兩翼驗
看甚需時日此次出派大臣較多著每翼分為二處
驗看至上三旗包衣護軍等亦當考驗即著交現派

大臣等一併驗看

二十七年

上諭據鐵保奏巡察所屬營兵看得遊擊阿林太不能
騎射且辦事遲鈍守備馬陞騎射生疎已咨明總督
將此二員叅奏等語旗員補放綠營員缺特因滿洲
人員騎射素優可作綠營官兵表式並非欲令伊等
在外安逸徒佔綠營之缺也伊等自應加意勤習騎
射可以為法綠營何致偷安怠惰馴致騎射生疎從

前朕屢經頒發諭旨即漢人身為武員尚不應出此
况滿洲乎在該管大臣等理應不時查驗一遇此等
人員立即叅奏何以拘泥成例直待將行軍政時始
行叅奏耶阿林太等身係遊擊不能騎射皆由平日
任意懈弛不勤練習之所致除將阿林太馬陞著交
部嚴加議處外並著通行曉諭各省督撫提鎮務將
所屬武職不時留心察閱令其勤加練習嗣後倘仍
有此等不能騎射之人不惟該員等罪無可逭必將

該督撫提鎮等一體治罪

三十二年

上諭前據定長奏護送健銳營兵丁酌雇竹兜應用並跟役亦為雇兜乘坐一節所辦全屬不知事體已經傳旨申飭官兵奉派進勦自應奮往邁征固無緩坐肩輿之理至於兵丁跟隨僕役責在効力服勤尤宜身奈勞苦即云道途遼遠乘騎不敷自應給與應得馬價或願沿途轉雇或願省費徒行皆未為不可若

如定長所奏使興堡之賤得一體乘兜而驅策昇送者皆地方清白良民毋論道路傳聞駭人觀聽且使該役等見所過地方如此多方體恤必將因惰生驕諸凡抑勒平人繹騷鄉里勢又何所不至其於軍行政體所關甚重若僅傳旨教誡不足示懲定長著交部嚴加議處並通諭官兵經過地方各督撫知之

三十九年

上諭馬步箭乃滿洲舊業向以此為要務無不留心學

習今國家昇平日久率多求安將緊要技藝全行廢棄不習因循懦弱竟與漢人無異朕痛恨之滿洲臣僕俱世受國家豢養之恩理宜自勵成材期與國家効力乃不知自愛竟成廢物甚屬不堪如朕已逾六旬仍每歲行圍木蘭特欲令滿洲臣僕服習勤苦熟諳技藝之意若不如此則滿洲各大臣侍衛官員兵丁等必致俱不能騎射矣國家與滿洲臣僕鼓勵教導之例至詳且備即如設立前鋒護軍等各營特派

大臣官員訓練又每旗設立十五善射十五缺每遇缺出揀選時不論王公文武大臣侍衛官員拜唐阿兵丁閑散宗室概行挑取帶領引見復按其班次將王公文武大臣官員概列於前因伊等熟練步箭每於伊等內挑取者居多拜唐阿兵丁排列於後挑取者甚少但王公大臣官員挑選十五善射或圖美名或為戴翎者多伊等或於未得之先尚以步箭為事及既挑之後即棄而不習反不若將拜唐阿兵丁等

多挑幾人伊等尚知各務陞途不時習練嗣後所有十五善射之缺惟將拜唐阿兵丁及各該旗閑散宗室揀選帶領引見挑取之後仍令在原差上行走務令加意練習如果嫻熟准該管大臣保舉於應陞處列名即以藍翎侍衛陞用倘不留心練習以致生疎者即行叅革至王公大臣侍衛官員內步箭果有嫻熟者挑取十五善射時不必佔拜唐阿兵丁閑散宗室等缺即於上三旗內每旗另添設十五缺將下五

旗王公大臣侍衛官員一併歸入揀選帶領引見挑
取如此辦理則王公大臣官員內步箭好者既不至
廢棄而兵丁陞路亦不致壅滯矣著交該管大臣將
現在十五善射作何分別挑取並新定之缺作何揀
選帶領引見之處詳加核定請旨永遠為例

四十年

上諭健銳營火器營俱由滿洲兵丁內揀選好另立之
營所關最為緊要現經管理此二營之大臣等操練

演習固屬盡心但因日久風氣漸弛即如在軍營則有詈罵將軍在本營即有偷盜馬匹之事若不及早整頓必至流為不堪大有關係著派舒赫德總管火器營派福隆安總管健銳營舒赫德福隆安不必輪班前往操練著每月去一二次查看整頓風俗嚴行約束毋令為匪並技藝務操演致精熟嗣後該二營官兵內如仍有無恥行為卑賤者朕惟伊二人是問

四十一年

上諭考驗未上衙門世職等步射務令每人多射數箭
從嚴試看始可分別優劣定其等第從前遇考試之
年派出之王大臣驗看步射不過令人射三箭即行
挑選此特王大臣等欲迅速竣事耳嗣後派出考試
世職之王大臣等必令各員俱射五箭加意詳閱再
定其等第揀選不得祇射三箭即行定擬也其軍政
等處特派王大臣考試步射者俱照此一體遵行著
為令

直省

八旗駐防營以將軍都統副都統掌其教閱訓練
騎射演放槍礮並以時親臨閱試第其優劣以為
賞罰春秋合操均與京營同八旗水師營每年春
秋二季將軍都統副都統等督率官兵分駕戰艦
金州福建乍浦廣東赴海口黑龍江齊齊哈爾默
爾根江寧于江面天津赴海口每年四月起八月
止均擇天氣晴和潮平風順時出洋列陣張帆起

破掌號鳴礮以次操演停操之後仍各率官兵講習水務

陸路綠旗營總督所屬為督標巡撫所屬為撫標提督所屬為提標總兵所屬為鎮標總督節制巡撫提鎮提督節制鎮標每歲秋李霜降日申令本標官兵校閱于演武場前一日各營將弁肅隊伍赴教場豫立軍營屆日黎明軍士擐甲列陣中軍建大纛于場正中將臺上傳令合操中軍揚旗麾

衆臺下舉礮三軍中鳴角擊鼓步騎甲士列隊行
陣施放槍礮連環無間並如京營之制若長槍藤
牌副刀短兵之屬各因其地之宜以教士卒皆有
成法閱畢試材官將士騎射技勇申明賞罰犒勞
軍士各釋甲歸伍漕運總督河道總督屆期教閱
本標官兵亦如之其各營將弁隨時訓練本管軍
士分按日期綠營水師有內河有沿江沿海出洋
信候各省不同每歲春秋季月或夏秋之季乘艦

列陣揚帆駛風鳴角發礮操演演具如軍律

乾隆元年

諭各省營伍離提鎮遼遠不能親身稽察該督撫酌量
地方營制如何令提鎮等隔數年一次親身察閱詳
議具題尋議准直隸提督分所屬為三路歲閱一路
三歲而遍馬蘭宣化正定三鎮歲各一閱泰寧天
津二鎮二歲各一閱山東兗州鎮臨清沂州等處
分路歲閱登州鎮西南東南等處分路歲閱二歲

而遍山西太原大同二鎮歲各一閱河南南陽河
北二鎮歲各一閱江南提鎮歲各一閱江西南昌
南贛二鎮歲一閱二歲而遍閩浙總督蒞任一閱
水師提督一歲閱海壇閩安烽火門等處一歲閱
金門南澳銅山等處二歲而遍陸路提督一歲閱
興化福州福寧建寧延平等處一歲閱泉州漳州
龍巖汀州邵武永春等處二歲而遍海壇金門南
澳台灣四鎮水師歲一閱福寧汀州建寧漳州四

鎮陸路歲一閱浙江提督三歲一閱定海黃巖溫
州三鎮歲各一閱衢州處州二鎮歲各一閱湖廣
總督蒞任一閱提督歲閱湖南湖北二歲而遍襄
陽宜昌永州鎮草四鎮歲各一閱陝甘總督五歲
一閱提督三歲一閱延綏興漢河州涼州寧夏西
寧肅州七鎮歲各一閱四川川北重慶建昌松潘
四鎮三歲各一閱廣東左翼右翼高州瓊州碣石
潮州南澳七鎮歲各一閱廣西提督三歲一閱左

江右江二鎮歲各一閱雲南貴州提鎮所屬酌數
年內一閱各疏報出巡回任日期及各營汛官兵
技藝是否純熟軍裝器械是否齊全以待部核

十年

諭國家設立營伍修明武備以為折衝禦侮之用必訓
練精熟於平日斯可奮勇決勝於臨時是以陸路設
營汛沿海設水師皆須勤演習以收實效自去年朕
命大臣察閱營伍後陸路該管大員頗肯竭力整頓

氣象而水師操演則不過將演就陣法塞責了事其操舟破浪之法官弁兵丁茫然不知以為此水手之事漫不留意即至舵工水手其能熟練者亦屬寥寥平日操演之事各船進退尚且參差往來間斷苟其臨敵何以致用夫水師以舟為主出沒風濤去來倏忽必掌舵者能操縱自如而搶風折艤破浪沖波水手等盡能嫻習即官弁兵丁等亦皆心領神會不待呼應而自靈然後猝然遇敵駕駛輕捷一舟之中臂

指相使如一人之身則應變制勝無難向來水師官弁仍以水師用原欲其熟悉情形收得人之效今則視為故套該管者不加察徼倖者苟延玩是育材之善政為容身之捷徑矣著通行申飭沿海將軍督撫都統提鎮等務遵朕旨實心訓練實心甄別毋得仍前玩忽虛應故事

十一年

諭國家設立營制所以嚴拱衛而固苞桑務在精選銳

以儲干城勤訓練以資捍禦所謂兵可百年不用不可一日無備也從前因各標營日漸廢弛朕命大臣前往山東河南江南等省先行閱看並降旨申飭復於督撫提鎮奏摺中時加批諭令其實力整頓今各省操演之法大抵旗纛戈甲期以飾觀步伐陣圖似為練習其實在技勇精強弓馬嫻熟者甚少在水師營汛亦不過演就水陣聊以塞責而已即軍政薦舉未能盡屬公當徒為具文以是整飭戎行豈能使壁

壘一新士氣日奮即如西北稱勁旅而江浙多柔脆
不知既以為兵自應鼓其銳氣使弱者日進於強豈
可任其委靡不加振作蓋營伍之中兵馬錢糧甲冑
器械皆宜事事留心向來虛冒兵糧私扣朋馬夤緣
拔補挪措軍裝等弊猶未盡除而教訓演習惟事粉
飾因循怠忽尚沿舊習殊非設兵衛民之意是必立
定年限專差大臣閱看庶將弁知有責成不敢怠廢
而各兵亦知有考驗時時警惕技藝不致生疎於戎

行自有裨。蓋朕前旨與以三年之限。著兵部請旨。並未定有分省察閱之年。分今已閱之省。則已過二年。其餘則未命前往也。其如何分年分省。差大臣往閱。著該部定議。俟臨時酌量。或自京師命大臣前往。或即命本省督撫察閱。尋議定。自乾隆十二年為始。閱直隸山西陝西甘肅四川十三年。閱湖北湖南雲南貴州十四年。閱福建浙江廣東廣西十五年。閱山東河南江南江西周而復始。但地方遼濶。若止

欽命大臣一人勢難周遍至甘肅處極邊安西提標駐
塞外若令閱川陝之大臣並閱則廣遠難周請于
應閱直隸等省之年差往直隸山西一人陝西四
川一人甘肅一人應閱湖北等省之年差往湖北
湖南一人雲南貴州一人應閱福建等省之年差
往福建浙江一人廣東廣西一人應閱山東等省
之年差往山東河南一人江南江西一人兵部于
每年開印後將應閱之省分並滿大學士領侍衛

內大臣都統尚書侍郎名單開列奏請或

欽點大臣前往或即令該督撫就近察閱恭候

欽定再向來各省督撫提鎮原有分年察閱營伍之例
嗣後各省如遇

欽點大臣察閱之年該省督撫提鎮傳其察閱至當提
督簡閱之年則各鎮傳簡閱當督撫簡閱之年則
提鎮概傳簡閱

十八年

諭各省標營分年特派大臣查閱又督撫提鎮有統轄
操防之責例應以時巡視所以簡軍實嚴武備也是
以各兵之漢仗技勇為本至於旗幟衣帽期足以別
隊伍整軍容無缺可矣奚事增美焉近來外省營汛
每遇大員蒞閱往往先期部署為一切觀美計製造
旗幟更易號衣公費不足遂坐扣兵糧以致伊等生
計為艱是營伍未有整頓之實而兵丁先被扣餉之
累殊非巡查簡閱之本意嗣後查驗兵丁務覈其實

毋以旗章衣服粉飾外觀至或有欽差大員經過營汛地方兵丁循例站隊者亦俱無庸張設旗幟總之整飭戎行全在漢仗技勇其緣飾之具皆屬無益之虛文而因以扣餉瘠兵則尤其大不可者著通行各省督撫提鎮咸共知之

二十二年

諭今日朕至杭州省城其接駕之綠營兵丁有奏簫管細樂者夫身隸行伍當以騎射勇力為重戍樓鼓角

不過用肅軍容即古者饒歌鼓吹之詞亦以鳴其得勝之氣耳若吹竹彈絲技近優伶豈挽強引重之夫所宜相效此等綠營陋習各省均所不免可傳諭各省督撫提鎮等轉飭所屬標營嗣後營伍中但許用鈺鼓銅角其簫管細樂概行禁止又

諭外省駐防將軍及綠營之提鎮出行則皆乘輿夫將軍提鎮有總統官兵之責若養尊處優自圖安逸亦何以表率營伍而作其勇敢之氣況旗人幼習騎射

即綠營中亦必以其弓馬優嫻始歷加陞用乃一至
大僚轉致狃於便安忘其故步此豈國家簡擢之意
耶京師都統副都統既皆乘馬而滿洲侍郎則無論
年逾六旬亦俱不得乘輿即朕巡省所至尚每日乘
馬而行乃外省武職獨相沿陋習此甚非宜嗣後將
軍提鎮概不許乘輿其編設轎夫並著裁革如有仍
行乘坐者照違制例治罪可通行傳諭知之

三十九年尚書公福隆安奏烏槍一項於軍器中

最為得用而進步連環尤為鳥槍中銳利之法八
旗勁旅凡遇專操會操惟演九進十連環使之精
熟是以所向無敵至各省綠營兵丁操演鳥槍不
過按照陣式虛應故事施之臨事全屬無用即如
征勦金川所有綠營兵丁放槍俱不得力直至派
出京城健銳火器兩營兵前往始各展其所長轟
擊殲賊幾無虛發近日臨清勦捕逆匪亦得京兵
之力其效已可概見伏思各省綠營原設鳥槍兵

與其循習虛文莫若練資實用請飭令各省督撫
提鎮詳查本省原設鳥槍兵若干俱令照健銳火
器二營進步連環鳥槍法式一體演習并飭該管
大員董率將領兵丁專心學習務使進退如法操
練精嫻庶臨用並能致勝而防守愈昭嚴飭矣

五十年

諭國家設兵衛民可百年不用不可一日無備陝甘兩
省係邊陲要區設兵不為不多乃逆回兩次滋事綠

營兵丁懦弱退縮致賊匪得以蔓肆鴟張此皆承平日久督撫提鎮不能實心整飭各營將弁不加操演講習因循怠玩以致兵備廢弛屢經降旨嚴切訓飭若能如福康安加意整頓于各標營內挑出兵丁一半專意訓練俾軍律嚴明士氣勁銳一變綠營懦弱之習兩省共有三萬餘勁旅設或地方稍有不靖又何患不立時撲滅耶在雲貴四川兩廣福建等省係沿邊沿海重地自應照福康安所辦于各營內挑選

壯健勤加訓習使各有數萬勁旅庶平時足以重操防而臨時可以供調遣即腹地亦當如此留心簡練各省皆係總督專主營政而山東山西河南江西係巡撫兼提督銜著將福康安原摺抄寄各省總督及山東山西河南江西巡撫一體留心不動聲色皆有精兵之備亦一至要也又

諭烏槍實為行軍利器著傳諭各省督撫務令兵丁時時操演嫻熟兵役奉差捕賊毋得施放空槍以期共


收實效又聞各省營伍槍兵每不得拔補馬戰及外委等以致槍兵無向上之心甚或以羸弱充數殊不知臨陣殲賊鳥槍弓矢尤為得力自應將熟練槍手一體拔補俾知上進有階則更爭相鼓勵踴躍演習

兵籍

凡八旗親軍前鋒鳥槍護軍於護軍驍騎步軍教養兵壯丁內拔補護軍於驍騎步軍教養兵壯丁內拔補驍騎於步軍教養兵正身壯丁內拔補步

軍於正身壯丁及戶下人內拔補教養兵於正身
幼丁內拔補領催於護軍驍騎內選充均由叅領
佐領選應補之人呈都統統領等簡覈錄其材力
驍勇者既入伍令各旗籍具名按季報部以時稽
其盈縮駐防兵由該管官於駐防壯丁內拔補若
駐防官子弟有嫻習騎射願於任所充伍者聽
凡直省考拔營兵以人材強壯技藝優嫻者充補
騎兵拔於步戰兵步戰兵拔於守兵守兵拔於餘

丁無餘丁乃募於民督撫提鎮本標及相近營汛
均親考拔餘令副叅考拔仍於巡閱屬營時覈之
考拔失實及虛佔名糧者論如法營兵令五人聯
名具保互相覺察其有不遵約束生事擾民容姦
保慝離次失伍有干紀律者皆論如法並坐其長



欽定八旗通志卷三十九